

INUIT ATAQATIGIIT

Inatsisartuni



UKA 2018/101
Ulloq 22.11.18
Aqqa Samuelson

Ilaqutariit nukittorsarumallugit ilaqutariinnik siunnersuisartut (coaching) pillugu apeqquaqat aallaavigalugu oqallinnissamik siunnersuut.

(Inatsisartunut ilaasortaq Nivi Olsen, Demokraatit).

Nivi Olsenip oqallisissiaanun pingaaruteqartumut qujavugut.

Ilaqutariit inuiaqatigiinni aallaaviupput pingaarnerpaat. Ilaqutariinni toqqissisimalluni inuuneqarneq inuiaqatigiit pitsaasumik ineriartornissaannut tunngaviuvoq.

Ilaqutariit eqqarsaatigalugit toqqissisimanartumik inuuneqarnissaat meeqqat, inuusuttut, angajoqqaat inuiaqatigiillu tamatta akisussaaffigaarput. Nukiit atorluarsinnaasagut atorlugit ilaqutariit inuuniarnikkut atugaat nukittorsarnissaat pingaaruteqarpoq.

Ullutsinni meerarpassuit inuusuttorpasullu sumiginnagaasarnerat eqqarsaatigalugu meeqqat angerlarsimaffimmiit avisaartillugit iliuuseqartariaqarsimanagerit ilungersunartuupput. Meeqqat inuusuttullu angerlarsimaffiup avataanut inissinnerisigut ilaqutariippasuit ajuusaarnartumik avisaartinneqartarput. Siunissami qaninnerusumi ungasinnerusumilu ilaqutariit avisaartinneqartarnerat iliuuseqarfigineqartariaqarpoq.

Meeqqat pillugit iliuuseqarnerit annertusaaffigineqarput. MIO tamatumani sunniuteqarlualuni angusaqarluartarlunilu suleqataavoq. Aamma nuannaarutigivarput MIO-p maannakkut ilaqutariit ataatsimut isigalugit ukiuni sisamani tulliuuttuni iliuuseqartussangormat. MIO-p ilaqutariit pillugit iliuuseriniagaanun malinnaasariaqarpugut inuiaqatigiittullu pingaartillugu kivitseqataalluta.

Maannakkut alloriarfioqqittariaqartumi inissisimavugut. Taamaattumik meeqqat inuusuttullu ilaqutariinnit avisaartinneqartarnerat iliuuseqarfiginiarlugu ilaqutariit katsorsarfigisinnaasaannik pilersitsinissaq aqquataalluarsinnaasoq isumaqarpugut.

Ilaqutariit avisaartuutsinnagit illoqarfigisag nunaqarfigisarlu qimannagit coacherisoqartalernissaa isummamigut pitsaasuvoq; inissaminiippoq siunissamilu periarfissaalertariaqarluni. Kisiannili unammilligassaqarpugut iliuuseqarfigisassatsinnik. Ilaqutariinnik coacherisinnaasunik illoqarfinni nunaqarfinnilu ataasiakkaani ilaqutariinnut coacherisinnaasutut ilinniagallit arlalissuunngillat, pissarsiarisinnaasagullu qitiusumiinnerullutik. Inulerinerulli iluani mianersorfissaqartugut isumaqarpugut. Ilaqutariinnik coacherinermi inuup misigissusai innarlerneqannginnissaat pingaaruteqarpoq. Taamaattumik ilaqutariinnik coacherinermik ilinniarluarsimasunik arlalilinnik

peqalertariaqarpugut sinerissami inoqarfinni amerlanerpaanik peqalissagutta. Ilaqutariinnik coacherisinnaasut siunissami amerlisarneqarnissaannut iliuuseqartoqartariaqarpoq. Ilinniartitsinernut amerlanerusunik aningaasaliisoqarnissaa pinngitsoorneqarsinnaasorinngilarput. Illoqarfinni nunaqarfinnilu amerlanerpaani coacherisartunik peqalernissaa pilersaarusiorkkamik tulleriarinikkullu annertusaaffigineratigut piviusunngortinneqarsinnaasoq takorloorsinnaavarput.

Aamma ungasianiit qarasaasiaq internettilu atorlugit coacherisoqarsinnaanissaa periarfissatut tikkuarusupparput. Ullutsinni siunissamilu attaveqatigiittarfiit pitsanngoriartuinnartillugit, ungasianiit ilaqutariinnut coacherisinnaanissaq pisariinnerulissammat.

Ullutsinni ilaqutariit isumassorneqarnissaannut periarfissat nukissallu killeqarnerat oqaatigisariaqarpoq. Ilaqutariit illui inoqarfinni assigiinngitsuni isumalluutigineqarput. Ilaqutariit illui eqqarsaatigalugit atorluarneqarnerulernissaannut pilersaarusiornissaq allaqquttussaangilaq. Nukissat pioreerput pigereerpagullu, taamaallaalli inerisaasoqartariaqarpoq ataqatigiissaarinerlu pitsaanerusariaqarluni. Ilaqutariit atugarliortut isumassorneqarnissamullu pisariaqartitsisut saniatigut ilaqutariit ingerlalluurtut isumassorneqarnerat ersarinnerusariaqarpoq.

Ilaqutariinni isumaginninnikkut sullissineq tamanut inissaqartitsisoq ingerlakkumavarput. Ilaqutariinni inuuniarnikkut atukkat peqqinnerlu ataqatigiissutut isigaavut. Suliassaqarfinni inunnik inuuniarnikkut sullissiviusuni ilaqutariinnut sullissivinni suleriaatsit ataqatigiissakkat atorneqartariaqarput. Aaqqissugaaneq ataqatigiissaaq ilaqutariillu sullinneqarneranni siusissukkut iliuuseqarneq, pinaveersaartitsineq, suliassaqarfiit akimorlugit suleqatigiinneq aaqqissugaanerlu tamarmik imminnut ataqatigiittariaqarput.

Inuit Ataqtigii oqallissaarummut qujapput. Naalakkersuisut Inatsisartunilu ilaasortat oqallilluarnissaannik kissaappagut.